



Nacioun Unido

Lou mounde entié se vai bandi dins la respelido di lengo terrenalo...

Prouvènço d'aro

Tóuti li mes, lou journau de la Prouvènço d'aro

Mars de 2021

n° 374

2,10 €

Crècho

Lou gouvèr es en passo d'eradica lou mau que tirasso, subre-tout en Prouvènço, l'emplantacioun di crècho à la fin de l'an... La dangerouseta es granda em'aquéu recampamen de santoun en un meme liò!

Pecaire! Saupre se li santounet devien pourta lou masque qu'à la debuto de nosto pandemio servié de rên, pièi aro es óbligatòri?

Saupre tambèn se poudrien resta planta coume de sànti-bèlli deforo après lou cuerbe-fiò?

Èro pas de questioun à pausa à-n-un gouvèr que viho, surviho e meno l'ataco sus tóuti li front dóu marridige sanitàri e culturau de la crècho.

Vuei, crido vitòri es en trin d'eradica lou mau d'aquelo envasioun pastouralo de santoun foro la lèi...

La survihanço fisado is autourita de l'Estat es granda, ativo, atentivo, coustanto, countinualo, ranfourçado, rigourouso... au proumié fiò d'uno candèlo atubado à l'entour d'uno crècho, es la granda alerto pèr sauva lou païs davans aquelo atroucita que duerb la porto à de rèi maje estrangié...

Ansin, aquest an, lou prefèt dóu Gard es pas esta en rèsto, pèr gagna la batèsto, n'a aganto uno d'aquélis ourribli representacioun de la neissènço d'un enfant, aquelo d'aquí s'escoundié mai s'outo l'escalé d'ounour de la coumuno de Bèu-Caire.

Moussu lou maire, Julian Sanchez, aura de paga 5.000 eurò d'astrencho pèr jour enjusqu'au desmountage...

Aguè bèu dire davans lou Tribunal amenistratiéu de Nime : "Il y a une tradition de crèches dans ma commune, des santons aussi. La municipalité organise depuis 15 ans des manifestations autour des crèches. Et puis il s'agit d'une crèche provençale, une richesse dans notre patrimoine et en plus nous valorisons l'artisanat local".

La rebecado di magistrat fuguè : "la cour d'appel a estimé qu'il n'y avait pas de tradition".

Dins noste lengage acò es pas clar, e pèr lou maire de Bèu-Caire nimai que vau sesi lou Counsèu d'Estat e ataca l'Estat pèr descriminacioun coume es de modo à l'ouro d'aro.

Basto! lou grand soucit dóu gouvèr parisen es toujours de sauva la Franço d'aquéu mau pastouralié.

Sai-que, sarié pas un crime contro l'umanita de mounta uno crècho dins li territòri óublida de la Republico...

Gerard Lybien

Sauva li lengo istourico



Tir bèn ajusta sus li sànti-bèlli

Se soun escapa sènso soulamen se masca, aquéli couioun de santoun e riscon mai de nous ramena soun mau à la fin de l'an, urousamen lou gouvèr assoulu de Paris mestrejò de man de ferre la prouvinço, em'aquelo forço autouritèri fai lou necessàri pèr restanca aquéu marrit pople de pastre, d'artisan, e de vilagés que nous fan soun Betelèn à bèus iue vesènt.

Pas besoun de s'escoundre vo de se descapela, soun ficha pèr li service de rensignamen de la Republico : Jourdan emé soun paro-plueio qu'agrippo, Bartoumiéu emé sa boutiho quand Pancrace, lou móunié, se despacho d'adurre sa balo de farino à la boulen-

jarié que se n'en vèi adeja lou mitroun en fenèstro.

Micoulau e Chinchourlet s'envènou tranquil emé lou bómian que canto coume un tron sènso veire d'uiou, mentre que Grasset e Grasseto, Simoun e Simouneto escouton li paraulo dóu gardo campèstre de la coumuno qu'emé soun porto-voues anóuncio l'arribado divino davans moussu lou maire cencha de sa taiolo en bello espèro.

La marchando de brouso, elo, arpentèjo la placeto dóu vilage ounte l'amoulaire s'apetègo d'agusa lèu si coutèu que lusisson au dardai dóu soulèu.

E dins la crècho, l'ase e lou biòu boufon soun bon alen, entre que Mario e Jousè

brèsson lou pichot enfant à l'espèro de Boutezar, Gaspard e Melquior que se n'ausis déjà lou bramadis de si camèu.

À l'ouro d'aro que se vai vouta uno nouvello lèi sus lou separatisme, d'un travers de dèt, à man seguro, lou cap d'Estat mostro sa mestrio identitari, lou Miejour restara infèuda à la capitalo, à-de-rèng li presidènt l'an leva sa lengo, e vuei lou nouvèu mètèr ié lèvo si tradicioun, se cantara plus Nouvè en Prouvènço, li Prouvençau dèvon definitivamen s'assimila, s'intègra à la francita... E li rebroussié que refuson toujours aquelo luenchenço coulounisacioun, lou gouvèr finira pèr li faire teisa à cop d'alabardo judiciàri...

Lou felibre di tamarisso

Es Mèste Eisseto, se n'en counmenouro aqueste mes sa despartido.

Pajo 6

L'aubran femenin

L'argumen es clar: s'outo la rusco d'un aubre s'escound uno divesso...

Pajo 3

Éugèni Valentin mariounetisto

La memòri de soun Tiatre di Niero s'es pas escapado en plen Carpentras...

Pajo 8